

«Noss candidat ha ina clera lingia burgaisa»

Partida populara svizra dal Grischun

DA GION NUTEGN STGIER/ANR

■ **La candidatura da Walter Schlegel per in sez en la regenza è strusch ina surpraisa. Nagina surpraisa è er betg che Valérie Favre Accola renunzia ad ina candidatura, ella che fa pir dapi 11 mais part dal cussegl pitschen da la vischnanca Tavau.** Suenter che las autras quatter partidas (pcd, pld, pbd e ps) han già nominà lur candidats per las elecziuns da la regenza dals 10 da zercladur 2018 è dapi ier er il candidat da la pps grischuna enconuschent. Igl è quai *Walter Schlegel*, l'um da Termin/Trimmis e dapi il 2012 cumandant da la polizia chantunala. Uschia va la pps da noss chantun cun el en il cumbat electoral per esser a partir da l'onn proxim danovamain represchentada en la regenza suenter in'absenza da diesch onns.

«A la fin finala avessan nus dabun dus sez»

La pps grischuna haja sapientivamain tschernì per la conferenza da medias ina interpresa mesauna a l'ur dals centers gronds (Zezras) per mussar sia gronda vischinanza tar las regiuns ed er tar manaschis mesauns, ha ditg *Heinz Brand*, il cusseglier naziunal e president chantunal da la pps. El ha accentuà clera-main che la pps grischuna avess a la fin finala il dretg d'avair en la regenza duas persunas, cun esser la partida dapi las elecziuns naziunalas dal 2015, cun stgars 30% dals electurs, la pli ferma partida en il Grischun. Ultra da quai haja la pps er adina testifitgà d'esser en il Grischun la partida che saja politicamain il pli da manavel a l'economia. Nagina autra partida represchenta uschè fitg l'interess da l'economia sco la pps, ha menziunà Brand.



La pps grischuna vul esser a partir da l'onn proxim danovamain represchentada en la regenza grischuna: Valérie Favre Accola, Heinz Brand e Walter Schlegel (da san.).

FOTO G. N. STGIER

«Grondas qualitads da manar»

Cun *Walter Schlegel* trametta la pps en il cumbat electoral ina persuna cun grondas qualitads da manar, im um serius ed in candidat cun bleras abilitads, ha punctuà Brand. La regenza dovra urgent in represchentan cun qualitads da manar, quai che na saja da preschent strusch il cass. Adina puspè hajan ils ultims onns projects fatg naufragi cun simplamain mancar en la regenza las persunas capablas. Schlegel haja ina gronda experientscha da manar, quai ch'el haja fatg en divers uffizis dal chantun e fetschia er sco cumandant da la polizia chantunala. Tut en tut haja el adina prestà e prestia anc adina lavur seriusa per il bain da la populaziun e da tut las regiuns, ha ditg il president da la pps grischuna.

Segir nagin dischavantatg

Sche tge manegia Brand a la dumonda da la popularitad da Schlegel? «Uss avain nus avunda temp da preschentar noss candidat

a la populaziun e cunzunt er da persvader giuven e vegl da dar a Schlegel la vusch.» Brand è er da l'opiniun che sco cumandant da la polizia chantunala haja Schlegel nagins dischavantatgs sco candidat per la regenza. La fin finala saja il cumandant anc adina ina personalitad, in um da respect ed er ina persuna fidada. Dal reminent saja el gia dapi 20 onns commember da la pps e cunzunt er in um cun ina clera lingia burgaisa. La regenza dovra in cusseglier guvernativ vardaivel per chattar las soluziuns gistas en vista a las grondas sfidas dals proxims onns, ha ditg Brand.

Stgaffir bunas premissas per l'economia

Che Schlegel candidescha sco funcziunari chantunal e schizunt cunter ses schef, cusseglier guvernativ *Christian Rathgeb*, na saja insumma nagin pregiudizi, ha ditg Brand. Schlegel sez vules en cas d'ina elecziun cunzunt s'engaschar per ina politica

fidaivla, da confidenza, reala e cunzunt er autentica. El veglia en spezial er segirar las plazzas da lavur en las regiuns, cunzunt en las regiuns perifericas, dentant er s'engaschar fitg per bunas cundiziuns da basa per l'economia ed er per l'agricultura. L'economia saja en il futur fitg dependenta da dmain birocrazia, ha punctuà Schlegel. El è er da l'avis ch'i dovria en l'avvegnir ina politica communai vla ed ina buna collavuraziun da tut las partidas en la regenza grischuna per ir en in futur positiv.

Gugent commembra dal cussegl pitschen

Cun *Valérie Favre Accola* avess la pps gi' ina buna schanza da cuntanscher in sez en la regenza cun las autras partidas avoir nominà be umens sco candidats per quel gremi politic. Ella saja fitg gugent commembra dal cussegl pitschen da la vischnanca da Tavau e dasperas er cun bler plaschair mamma da dus mats ed ina matta. Ultra da quai

saja ella engaschada fitg cun l'affar da ses um *Paul Accola* ed er da la Fundaziun da promoziun dals giuvens *Paul Accola*, ha ditg l'antieriura scheffa da comunicaziun da l'Universitad da Fribourg. Ultra da quai avess la populaziun da Tavau pouca tgapientscha sch'ella avess tar ina eventuala elecziun da dismetter cun la lavur en il cussegl pitschen da ses lieu, ha menziunà Favre Accola. Per las tschernas dal cussegl grond sa mettia ella gugent a disposiziun, dentant las elecziuns da la regenza sajan per ella nagin tema, ha punctuà la dunna da Tavau.

Set candidats per tschintg sez

La pps vegn a nominar Schlegel ils 8 da schaner 2018 e sia nominaziun na vegn strusch a chaschunar per discussiuns. Cun la publicaziun uffiziala da sia candidatura per la regenza èn da preschent enconuschents ils numns da tut las persunas che van en il cumbat electoral per ils tschintg posts. La reelecziun dals cussegliers guvernativs en uffizi, *Mario Cavigelli* (pcd), *Jon Domenic Parolini* (pbd) e *Christian Rathgeb* (pld) è strusch in che dubitescha. Per ils ulteriurs dus posts vegn i segir tar ina pulita lutga cun in avantatg dal candidat da la ps, *Peter Peyer*. En la politica grischuna è el bain ina «vulp veglia», in um cun blera experientscha e lura cun davos ses dies votantas e votants fidaivels. Cun *Marcus Caduff* (pcd) va en la cursa in um enconuschent en Surselva, dentant en autras regiuns è il Lumnezian strusch popular. Quai è er il cas tar *Andreas Felix* (pbd), el ch'è mainagestiu dals impressaris da construcziun grischuns ed er enconuschent be en quel tschertgel. Da supponer è che *Walter Schlegel* (pps) haja bunamain megliers trumfs envers *Caduff* e *Felix*, cunzunt cun avoir in ferm sustegn dals agens electurs.